

आकाशवाणी

खबरां -----

1. भारती जनता पार्टी दे वरिष्ठ नेता ते प्रधानमंत्री नरेंद्र मोदी होरें इटावा च इक रैली गी संबोधित करदे होई कोविड मामले पर समाजवादी पार्टी ते कांग्रेस दी सख्त निंदा कीती।
2. भारती जनता पार्टी दे नेता ते गृह मंत्री अमित शाह होरें आखेआ जे बीजेपी एस.सी/एस.टी ते होरनें पच्छड़े दे वर्गें दे आरक्षण दी हिफाजत करोग ते उसी बदाग।
3. मुख्य निर्वाचन आयुक्त होरें 75 अंतरराष्ट्रीय प्रतिनिधिं गी भारत च होआ रदे लोकसभा चुनां दे बक्ख-बक्ख पैहलुं बारै जानकारी दिती।
4. छत्तीसगढ़ दे दंतेवाड़ा जिले च अज्ज 35 माओवादिं आत्मसमर्पण कीता।
5. मौसम विभाग नै पूर्वी भारत च अज्जै तगर ते भारत दे दक्खनी हिस्से च कल तगर बड़ी मती गर्मी दी स्थिति बनी रौहने दी पेशनगोई कीती ऐ।

<><><><><><><>

PM-UP

प्रधानमंत्री ते भारती जनता पार्टी दे वरिष्ठ नेता नरेंद्र मोदी होरें उत्तर प्रदेश दे इटावा च इक जनसभा गी संबोधित कीता। जनसभा गी संबोधित करदे होई उनें कोविड मुद्दे पर समाजवादी पार्टी ते कांग्रेस दी सख्त निंदा कीती। उनें आखेआ जे इनें पार्टिं कोविड दौरान झूठ फैलाने ते लोकें गी उकसाने दी कोशिश कीती। जिसले कि उंदी सरकार ते साइंसदान हर व्यक्ति दे जीवन गी बचाने दी कोशिश च लग्गे दे हे। इटावा समाजवादी पार्टी प्रमुख अखिलेश यादव हुंदा जद्दी कस्बा ऐ। प्रधानमंत्री होरें इत्थे भाई-भतीजावाद दे मुद्दे गी पुट्टेआ ते आखेआ जे किश परोआरें दा मनना ऐ जे किश क्षेत्र उंदी व्यक्तिगत संपत्ति न, पर इस बारी एह नेई होग। अयोध्या च मोदी हुंदा रोड शो करने दा कार्यक्रम ऐ। उत्तराखंड दे मुखमंत्री ते भाजपा दे वरिष्ठ नेता पुष्कर सिंह धामी होर बी अज्ज बदायूं जिले च रोड शो करडन। उत्तर प्रदेश दे कांग्रेस प्रभारी अविनाश पांडे होर कौशांबी च अपनी पार्टी दे मेदवार दे पक्ख च इक रैली करडन।

<><><><><><><>

Amit Shah

भारती जनता पार्टी दे वरिष्ठ नेता ते गृह मंत्री अमित शाह होरें आखेआ ऐ जे भारती जनता पार्टी एस.सी एसटी ते होरनें दुए पच्छड़े दे वर्ग दे लोकें दा आरक्षण बदाग ते ओहदी हिफाजत करोग। उनें आखेआ जे आदिलाबाद दे लोकें गी मोदी हुंदी गरंटी ते कांग्रेस दी तुष्टिकरण दी राजनीति बशकार चुनना ऐ। उनें आखेआ जे कांग्रेस आस्सेआ साम्प्रदायें दे आधार पर दिता गेदा आरक्षण खत्म कीता जाग ते अनुसूचि जाति, अनुसूचित जनजाति ते होरनें पच्छड़े दे वर्ग दे लोकें दे हक्क दी हिफाजत कीती जाग। शाह होरें कांग्रेस दे आरक्षण आले मामले पर भरोसा नेई करने लेई गलाया। एनडीए सरकार दे पिछले 10 बरे दे कार्यकाल दी गल्ल करदे होई उनें आखेआ जे आतंकवाद ते नक्सलवाद गी काफी हदें तगर खत्म कीता गेआ ऐ।

<><><><><><><>

AP-Amit Shah

गृह मंत्री ते भारती जनता पार्टी दे वरिष्ठ नेता अमित शाह होरें आखेआ ऐ जे प्रधानमंत्री नरेंद्र मोदी हुंदी अगुवाई करी 80 करोड़ लोकें गी पी.एम गरीब कल्याण योजना तैहत मुफ्त राशन मिलेआ

ऐ 50 करोड़ लोकें गी आयुष्मान भारत योजना दे तैहत 5 लक्ख रुपे दा सेहत बीमा हासिल होआ। शाह होरें अज्ज आंध्र प्रदेश दे हिंदुपुर लोकसभा क्षेत्र दे धर्मावरम च इक चुनावी सभा च आखेआ जे मुल्ख च 130 करोड़ लोकें गी मुफ्त कोविड-19 वैक्सीन दिती गई। उनें आखेआ जे आंध्र प्रदेश दे मौजूदा मुखमंत्रि वाई.एस जगन मोहन रेड्डी होरें विकास दी अनदिक्खी कीती ते राज्य च निवेश गी आकर्षित करने च नाकाम रेय। शाह होरें राज्य च समग्र विकास आस्तै चंद्र बाबू नायडू जनेह अनुभवी नेताएं गी चुनने दी अपील कीती।

<><><><><><><>

Congress-Odisha

कांग्रेस नै ओडिशा च औंदे विधानसभा चुनां आस्तै 6 मेदवारें दी सूचि जारी कीती ऐ। पार्टी दे जलेश्वर विधानसभा सीट सोयां देवी प्रसन्ना चंद हुंदी थाहर सुदर्शन दास होरें गी टिकट दिता। पुरी विधानसभा सीट पर सुजीत महापात्रा हुंदी थाहर उमा बल्लव रथ होरें गी टिकट दिता।

<><><><><><><>

Withdrawal-Date

लोकसभा दे 5में गेड़ दे चुनांस लेई नामजदगियां वापसा लैने दा कल खीरी ध्याड़ा ऐ। जम्मू-कश्मीर दे बारामूला लोकसभा हल्के ते लद्दाख दी इक्कली लोकसभा सीट लेई इस्सै गेड़ तैहत 20 मई गी मतदान होग। मेदवार कल 6 मई संगारें दपैहरी 3 बजे तगर रिटर्निंग अफसर हुंदे दफ्तर च अपना नामांकन वापस लेई सकदे न। नामजदगी आले कागदें-पतरें दी जांच दे बाद हुन 23 मेदवार चुनांस मैदान च न जिंदे च साबका मुखमंत्री ते नेशनल कांफ्रेंस दे उप-प्रधान उमर अब्दुल्ला ते साबका मंत्री सज्जाद गनी लोन बी शामिल न। लद्दाख च 5 मेदवारें दे नामजदगी आले कागद-पतर दुरूस्त पाए गे न जिसले के 3 मेदवारें दे नामांकन रद्द बी करी दिते गेदे न। लद्दाख सीट लेई जेड़े मेदवार चुनांस मैदान च न, उंदे च बीजेपी दे ताशी ग्यालसन ते कांग्रेस दे सेरिंग नामग्याल शामिल न। इंदे अलावा 3 अजाद मेदवार मोहम्मद हनीफा जान, सज्जाद हुसैन कारगिली ते काचो मोहम्मद फिरोज बी चुनांस मैदान च न। तोआई, इस म्हीने दी 7 तरीक गी मुख्य दे 10 राज्यें ते 1 केंद्र शासित प्रदेश दिएं कुल 93 लोकसभा सीटें पर त्रीये गेड़ तैहत वोट पोआए जाने न।

CEC-Deligation

प्रमुख निर्वाचन आयुक्त राजीव कुमार हों अज्ज नमी दिल्ली च 75 अंतरराष्ट्रीय प्रतिनिधिं गी भारत च होआ करदे लोकसभा चुनां दे बख-बख पैहलुं बारै जानकारी दिती। 23 मुखें दे चुनांस प्रबंधन सरबंधि निकां दे प्रतिनिधिं गी संबोधित करदे होई उनें दस्सेआ जे दुनिया दी सब्बनें शा मती अबादी आले ते सब्बनें शा बड्डे लोकतंत्र च किस चाली सुतंत्र, निर्पख, पारदर्शी, जवाबदेह ते बवस्था आले ढंगै सिर चुनांस प्रक्रिया गी तोड़ चाढ़ेया जंदा ऐ। चुनांस आयोग नै इनें प्रतिनिधिं गी लोकतंत्र दे महापर्व गी दिखने ते समझने लेई साद्दा दिते दा हा। अज्ज इनें प्रतिनिधिं, इंदे लेई लोआए गेदे पैहले कार्यक्रम च शिरकत कीती। इंदा भारत दे 6एं राज्यें, महाराष्ट्र, गोवा, गुजरात, कर्नाटक, मध्य प्रदेश ते उत्तर प्रदेश दे केई लोकसभा हल्कें दा दौरा करने दा कार्यक्रम ऐ।



Special Poll Station

कश्मीरी विस्थापितें लेई राहत ते आबादकारी दे कमिशनर डॉक्टर अरविंद कारवानी हों उधमपुर च खडरे गेदे विशेष मतदान केंद्र च

कश्मीरी विस्थापितें लेई कीते गेदे चुनावी प्रबंधें दी समीक्षा कीती। आकाशवाणी दे जम्मू संवाददाता दी रिपोर्ट मुजब कश्मीरी विस्थापित मतदाताएं लेई जम्मू, उधमपुर ते दिल्ली च विशेष मतदान केंद्र बनाए गेदे न। एहदे अलावा उंदे कोल डाक राहें वोट पाने दा विकल्प बी होग ते एहदे लेई उनें'गी पैहले फार्म-12 सी भरना होग। श्रीनगर लोकसभा हल्के लेई 13 मई गी, बारामूला हल्के लेई 20 मई गी ते अनंतनाग राजौरी हल्के लेई 25 मई गी वोट पोआए जाने न। एहदे शा पैहले पिच्छले हफते डॉ. कारवानी होरें दिल्ली च 4 थाहरें ते जम्मू च 21 थाहरें पर बनाए गेदे विशेष मतदान केंद्रें पर जाइयै उत्थे उपलब्ध सुविधाएं दा जायजा लैता। उनें मतदाताएं गी ते खास करियै पैहली बारी मतदान करने आलें गी अपील कीती जे ओह पक्क गै वोट पाने दी अपनी जिम्मेदारी निभान।

<><><><><><><>

Chhattisgarh

छत्तीसगढ़ दे दंतेवाड़ा जिले च अज्ज 35 माओवादिएं आत्मसमर्पण कीता ऐ। इंदे चा 3 माओवादिएं पर ईनाम घोषित कीता गेदा हा। इनें मातोवादिएं दंतेवाड़ा पुलस दे लोन वराटू अभियान तैहत दंतेवाड़ा क्षेत्र दे डी.आई.जी कमलोचन कश्यप ते केंद्री रिर्जब पुलस बल ते पुलस दे

वरिष्ठ अधिकारिणं अग्रे आत्मसमर्पण कीता। सब्बै माओवादी
भैरामगढ़ ते कते कल्याण क्षेत्र समिति संगठन दे सक्रिय सदस्य हे।
सब्बै माओवादी नक्सली गतिविधियें ते सड़क अवरोध जनेह् मामले च
आरोपी हे। आत्मसमर्पण ते पुणाबहाली नीति तैहत सरकार सारे
माओवादिणं गी 25 ज्हार रपे देग। दंतेवाड़ा पुलस आस्सेआ लोन वराटू
अभियान तैहत 796 माओवादी आत्मसमर्पण करी चुके दे'न।

<><><><><><>

IAF-Tributes

भारती वायु सेना नै पुंछ सेक्टर च आतंकवादिणं दी गोलीबारी च
शहीद कारपोरल विक्की पहाड़े हुंदे परिवार आलें कन्नै गैहरा दुख ते
हमदर्दी प्रगट कीती ऐ। वायु सेना दे सोशल मीडिया पर इक पोस्ट
च आखेआ गेआ ऐ जे वायु सेना प्रमुख एयर चीफ मार्शल वी.आर
चौधरी हुंदे सने वायु सेना दे सब्बै कर्मी देसै लेई सर्वोच्च बलिदान
देने लेई श्री पहाड़े होरें'गी नमन करदे न।

<><><><><><>

EAM-Jaishankar

विदेश मंत्री एस. जयशंकर होंरें अज्ज आखेआ ऐ जे पाकिस्तान दे नजैज कब्जे आला जम्मू-कश्मीर दा इलाका बी भारत दा अनत्रुट्ट हिस्सा ऐ ते इस बारै भारती संसद च बकायदा इक प्रस्तास पास होए दा ऐ। उनें आखेआ जे लोकें गी एह सच्चाई भुलाने दी कोश्ट कीती गेई पर भारत ते लोक इस बारै हुन परतिए पूरी चाल्ली सुर्त च ते जागृत होई चुके दे न। जम्मू-कश्मीर चा दफा 370 गी ढहाने बारै गल्ल करदे होई एस. जयशंकर होंरें आखेआ जे इसी क्या चिर पैहले ढहाया जाई चुके दा होना लोड़चदा हा, कीजे जदूं तगर दफा 370 वजूद च हा, बक्खवाद ते अत्तवाद दी भावना बी बरकरार रक्खी जा रदी ही। दफा 370 हटाने दे आलोचकें गी संबोधित करदे होई उनें आखेआ जे एह इक आरजी बवस्था ही जिस हटाना गै हटाना हा। उनें आखेआ जे जम्मू-कश्मीर च दफा 370 इस करिए लागू रेहा कीजे एहदे पिच्छे केई लोकें दे निजी मफाद ऐ।

<><><><><><>

IMD-Weather

पूर्वी भारत च अज्जै तगर ते भारत दे दक्खनी हिस्से च कल तगर बड़ी मती गर्मी दी स्थिति बनी दी रेई सकदी ऐ। मौसम विभाग नै

अज्ज गांगेय पच्छम बंगाल दी किश थाहरें पर बड़ी मती गर्मी पौने दी पेशनगोई कीती दी ही। बिहार, ओडिशा ते तटीय आंध्र प्रदेश दी किश थाहरें पर अज्ज बड़ी मती गर्मी पौने दी स्थिति रौहने दी बी पेशनगोई कीती गेदी ही। तेलंगाना ते विदर्भ च अज्ज ते कल ते कनार्टक च इस म्हीने दी 7 तरीक तगर बड़ी मती गर्मी पौने दी संभावना जाहिर कीती गेई ऐ। मौसम विभाग नै पूर्वोत्तर भारत च 7 मई तगर अंधी, झकखड़ ते तेज हवाएं कन्नै बरखा पौने दी बी पेशनगोई कीती ऐ। अरूणाचल प्रदेश, असम, मेघालय, नागालैंड, मणिपुर, मिजोरम ते त्रिपुरा च अगले 7 दिनें तगर बदल गरजने, बिजली चमकने ते तेज हवाएं कन्नै हल्की थवां दरम्याने दर्जे दी बरखा होई सकदी ऐ। भारत दे पूर्वी ते दरकखनी हिस्सें च बी 9 मई तगर अंधी झकखड़ ते तेज हवाएं कन्नै बरखा होने दी संभावना जाहिर कीती गेई ऐ।

<><><><><><><>